

31. juli 2016

Inatsisartut suleriaasianni § 33 naapertorlugu aallajangiiffigisassatut siunnersuut imaattoq matumuuna ingerlatippara:

Neriniartitsivinni neriniartitsinerup naatitanut nungusaataangitsumik ingerlanneqarsinnaanera pillugu Naalakkersuisut misissueqqullugit peqquneqarnissaannik Inatsisartut aalajangiiffigisassaattut siunnersuut. Misissuinermi ullumikkut uumasuutitut neriniartitsiviusut nunaminertallu taakkua qanittuaniittut ilanngullugit nalilersorneqassapput uumasut qassit naasoqassutsip nammassinnaaneraa, taamaalilluni piffissaq sivilisunerusoq eqqarsaatigalugu tunisassiorsinnaaneq pitsaanerpaaq qulakkeerumallugu. Misissuinermi inerniliussaqaq UPA-2018-imi saqqummiunneqassaaq.

(Inatsisartunut ilaasortaq Suka K. Frederiksen, Siumut)

Tunngavilersuut:

Savaateqarnermi, histiiteqarnermi, tuttuuteqarnermi, nersutaateqarnermilu uummasuuteqartut akornanni neriniartitsiviit qanoq issusaat akiuussinnaassusaallu (nungujaatsuunissaat) pingaaruteqarluinnartuupput. Uumasuuteqarnermi neriniartitsiviit aalajangiisuusaarput uumasut neriniartitsivimmi amerlassuserisinnaasaanut, tamassumami uumasuuteqarnermi inuussutissarsiuteartut isertitaqarsinnaanerannut aalajangiisuulluinnartarmata napaannarnissaanullu.

Uumasut neriniartitsivimmi ataatsimi amerlavallaat nerisassaannik nungukkiartortitsisussaapput. Neriniartitsiviit akiuussinnaanera sunnerneqarpallaaleraangat nuna annertuumik sunnerneqaannarani aammali uummasuutit atugarliulersarput. Ukiuni kingullerni savaatit tunineqartartut ikiliartorput, tamannalu ilaatigut neriniartitsiviit annertussusaanut attuumassuteqarpoq, taamaattumik savaaqaat toqorarneqartut amerlassusaannut toqqaanartumik patsisaaqataalluni.

Neriniartitsiviit qanoq uummasuutitik amerlatigisunik tiguisinnaaneri misissuinermi annerpaaffilerlugu killilerneqarnissaat pisariaqarpoq, pingaartumik uummasuutitik allanik tikilluaqqusisoqassappat. Inuussutissarsiutit pioreersut inerisarneqarnissaanut nungusaataangitsumik ivigartortitsinissaq pingaaruteqarpoq naak tamakkiisumik isiginnilluni neriniartitsiviit ulorianartorsiunngikkaluartut.

Kingullermi neriniartitsiviit pillugit misissuisoqarpoq 1980-kunni Savaateqarnermik misilittagaqarluartut Islandimeersut peqatigalugit suliarineqartumi, kisianni taamanili uumasuutit qanoq amerlatigisut neriniartitsivimmi illersorneqarsinnaasumik uumasuutigineqarsinnaanersut allassimasuniit ullumikkut silaannaq allanngorartuarnera patsisaalluni uumasuutit sumiiffiit ilaanni amerlassusilerneqarnissaat annertuumik allanngornikuusut naatsorsuutigineqarsinnaavoq.

Neriniartitsiviit ingerlaavartumik ilisimasanik aallaaveqartumik paasissutissanik peqarfigisariaqarpagut, pingaaruteqarmata issup neriniartitsiviusup sumiiffinni pineqartuni qanoq ittuuneranik periarfissaasut paasissutissat atorlugit anguniakkat aqqutigalugit sulisoqartarnissaat.

Ilisimaneqarpoq nuna neriorneqartoq uummasuutit amerlavallaanik atorneqarpat sivilisuumik ajoqqutaasinnaasumik sunnerneqaataasartoq tamannalu pinaveersaasallugu pisussaaffeqarpugut, pingaartumik sumiiffinni eqimasuni uummasuuteqarfiusuni.

Taamatut oqaaseqarlunga aalajangiiffigisassatut siunnersuut ingerlatippara meeqqatta siunissaat pillugu tigulluarneqarnissaa kaammattuutigalugu.

Namminersorlutik Oqartussanut aningaaatigut allaffisoornikkullu kingunissai

Ilimagineqassaaq sumiiffiit neriniartitsiviusut orninneqartariaqarnissaat (savaateqarfiit 37-it amerlanerit imminnut qanitariittut, tuttuutillit marluk, nersutaatilik ataaseq) angalanernut aningaasartuutit missaanni 100.000,00 saniatigut ukiorlu ataaseq sulineq ingerlanneqarsinnaassasoq ass. Agronomit ilinniagaqartoq sulitinneqarluni 400.000,00

Namminersorlutik Inuussutissarsiortunut aningaasatigut allaffissornikkullu kingunissai

Soqanngilaq

Innuttaasunut aningaasatigut allaffissornikkullu kingunissai:

Soqanngilaq